



文選卷第五十八

梁昭明太子蕭統撰

哀下

宋文皇帝元皇后哀策文一首

顏延年

惟元嘉十七年七月二十六日大行皇后崩于
顯陽殿粵九月二十七日將遷座于長寧陵禮
也龍輶纚紼容翟結驂皇塗昭列神路幽嚴皇
帝親臨祖饋躬瞻宵載飾遺儀於組旒淪徂音

乎珩珮悲黼筵之移御痛翬榆之重晦降輿客
位撤奠殯階乃命史臣累德述懷其辭曰倫昭
儷升有物有憑圓精初爍方祗始疑昭哉世族
祥發慶膺秘儀景胄圖光玉繩昌暉在陰柔明
將進率禮蹈和稱詩納順爰自待年金聲夙振
亦既有行素章增絢象服是加言觀維則俾我
王風始基嬪德惠問川流芳猷淵塞方江泳漢
載謠南國伊昔不造鴻化中微用集寶命仰陟
天機釋位公宮登曜紫闈欽若皇姑允迪前徽

孝達寧親敬行宗祀進思才淑傍綜圖史發音
在詠動容成紀壺政穆宣房樂韶理坤則順成
星軒潤飾德之所屆惟深必測一節震騰上清
眺側有來斯雍無思不極謂道輔仁司化莫晰
象物方臻眡侵告沴大和旣融收華委世蘭殿
長陰椒塗弛衛嗚呼哀哉戒涼在肆杪秋卽窆
霜夜流唱曉月升魄八神警引五輅遷跡噉噉
儲嗣哀哀列辟灑零玉墀雨泗丹掖撫存悼亡
感今懷昔嗚呼哀哉南背國門北首山園僕人

按節服馬顧轅遙酸紫蓋眇泣素軒滅絳清都
夷體壽原邑野淪謁戎夏悲謹來芳可述往駕
弗援嗚呼哀哉

齊敬皇后哀策文一首 謝玄暉

惟永泰元年秋九月朔日敬皇后梓宮啓自先
塋將祔于某陵其日至尊親奉奠某皇帝乃使
兼太尉某設祖柩行宮禮也翠帟舒阜玄堂啓
扉俎徹三獻筵卷六衣哀子嗣皇帝懷蜃衡而
延首想鷺輅而撫心痛椒塗之先廓哀長信之

莫臨身隔兩赴時無二展旋詔左言光敷聖善
其辭曰帝唐遠胄御龍遙緒在秦作劉在漢開
楚肇惟淑聖克柔克令清漢表靈曾沙膺慶爰
定厥祥徽音允穆光華沼沚榮曜中谷敬始絃
綖教先種稷睿問川流神襟蘭郁先德韜光君
道方被于佐求賢所謁無訛顧史弘式陳詩展
義厚下曰仁藏往伊智十亂斯俟四教罔忒思
媚諸姑貽我嬪則化自公宮遠被南國軒曜懷
光素舒佇德閔予不祐慈訓早違方年冲藐懷

袖靡依家臻寶業身嗣昌暉壽宮寂遠清廟虛
歸嗚呼哀哉帝遷明命民神胥悅乾景外臨陰
儀內缺空悲故劍徒嗟金穴璋璣奚獻禕榆罔
設嗚呼哀哉馮相告侵宸駕長往貽厥遠圖末
命是獎懷豐沛之綢繆兮背神京之弘敞陋蒼
梧之不從兮遵鮒隅以同壤嗚呼哀哉陳象設
於園寢兮映輿鏐於松楸望承明而不入兮度
清洛而南游繼池緯於通軌兮接龍帷於造舟
迴塘寂其已暮兮東川濔而不流嗚呼哀哉藉

閔宮之遠烈兮開續女之遐慶始協德仁蘋蘩
兮終配祀而表命慕方纒於賜衣兮哀日隆於
撫鏡思寒泉之罔極兮託彤管於遺詠嗚呼哀
哉

碑文上

郭有道碑文一首

蔡伯喈

先生諱泰字林宗太原界休人也其先出自有
周王季之穆有虢叔者寔有懿德文王咨焉建
國命氏或謂之郭即其後也先生誕應天衷聰

欽明哲孝友溫恭仁篤慈惠夫其器量弘深姿
度廣大浩浩焉汪汪焉奧乎不可測已若乃砥
節礪行直道正辭貞固足以幹事隱括足以矯
時遂考覽六經探綜圖緯周流華夏隨集帝學
收文武之將墜拯微言之未絕于時纓綬之徒
紳珮之士望形表而影附聆嘉聲而響和者猶
百川之歸巨海鱗介之宗龜龍也爾乃潛隱衡
門收朋勸誨童蒙賴焉用祛其蔽州郡聞德虛
已備禮莫之能致群公休之遂辟司徒掾又舉

有道皆以疾辭將蹈鴻涯之遐跡紹巢許之絕
軌翔區外以舒翼超天衢以高峙稟命不融享
年四十有二以建寧二年正月乙亥卒凡我四
方同好之人永懷哀悼靡所寘念乃相與惟先
生之德以謀不朽之事僉以爲先民旣沒而德
音猶存者亦賴之於見述也今其如何而闕斯
禮於是樹碑表墓昭銘景行俾芳烈奮于百世
令聞顯於無窮其辭曰於休先生明德通玄純
懿淑靈受之自天崇壯幽浚如山如淵禮樂是

悅詩書是敦匪惟據華乃尋厥根宮牆重仞允
得其門懿乎其純確乎其操洋洋措紳言觀其
高棲遲泌丘善誘能教赫赫三事幾行其招委
辭召貢保此清妙降年不永民斯悲悼爰勒茲
銘摘其光曜嗟爾來世是則是效

陳太丘碑文一首

蔡伯喈

先生諱寔字仲弓潁川許人也含元精之和應
期運之數兼資九德摠脩百行在鄉黨則恂恂
焉彬彬焉善誘善導仁而愛人使夫少長咸安

懷之其為道也用行捨藏進退可度不徼訐以
干時不遷怒以臨下四為郡功曹五辟豫州六
辟三府再辟大將軍宰聞喜半歲太丘一年德
務中庸教敦不肅政以禮成化行有謚會遭黨
事禁錮二十年樂天知命澹然自逸交不諂上
愛不瀆下見機而作不俟終日及文書赦宥時
年已七十遂隱丘山懸車告老四門備禮閑心
靜居大將軍何公司徒袁公前後招辟使人曉
喻云欲特表便可入踐常伯超補三事紆佩金

紫光國垂勲先生曰絕望已久飾巾待期而已
皆遂不至弘農楊公東海陳公每在衮職羣寮
賀之皆舉手曰潁川郡陳君絕世超倫大位未
躋慙於文仲竊位之負故時人高其德重乎公
相之位也年八十有三中平三年八月丙午遭
疾而終臨沒顧命留葬所卒時服素棺槨財周
櫬喪事唯約用過乎儉羣公百僚莫不咨嗟巖
藪知名失聲揮涕大將軍弔祠錫以嘉謚曰徵
士陳君稟岳瀆之精苞靈曜之純天不勅遺老

俾屏我王梁崩哲萎于時靡憲措紳儒林論德
謀跡謚曰文範先生傳曰郁郁乎文哉書曰洪
範九疇彝倫攸叙文爲德表範爲士則存誨沒
號不亦宜乎三公遣令史祭以中牢刺史敬弔
太守南陽曹府君命官作誄曰赫矣陳君命世
是生含光醇德爲士作程資始旣正守終又令
奉禮終沒休矣清聲遣官屬掾吏前後赴會刊
石作銘府丞與比縣會葬荀慈明韓元長等五
百餘人總麻設位哀以送之遠近會葬千人已

上河南尹种府君臨郡追歎功德述錄高行以
爲遠近鮮能及之重部大掾以成時銘斯可謂
存榮沒哀死而不朽者已乃作銘曰峩峩崇嶽
吐符降神在皇先生抱寶懷珍如何昊穹既喪
斯文微言圯絕來者曷聞交交黃鳥爰集于棘
命不可贖哀何有極

楮淵碑文一首

王仲寶

夫太上有立德其次有立功此之謂不朽所以
子產云亡宣尼泣其遺愛隨武既沒趙文懷其

餘風在文簡公見之矣公諱淵字彥回河南陽
翟人也微子以至仁開基宋段以功高命氏爰
逮兩漢儒雅繼及魏晉以降奕世重暉乃祖太
傅元穆公德合當時行比州壤深識臧否不以
毀譽形言亮采王室每懷冲虛之道可謂婉而
成章志而晦者矣自茲厥後無替前規建官惟
賢軒冕相襲公稟川嶽之靈暉含珪璋而挺曜
和順內凝英華外發神茂初學業隆弱冠是以
仁經義緯敦穆在閨庭金聲玉振寥亮在區宇

孝敬淳深率由斯至盡歡朝夕人無間言逍遙
乎文雅之囿翱翔乎禮樂之場風儀與秋月齊
明音徽與春雲等潤韻宇弘深喜愠莫見其際
心明通亮用人言必猶在已汪汪焉洋洋焉可
謂澄之不清撓之不濁袁陽源才氣高奇綜覈
精裁宋文帝端明臨朝鑒賞無昧袁旣延譽在
遐邇文亦定婚在皇家選尚餘姚公主拜駙馬
都尉漢結叔高晉姻武子方斯蔑如也釋褐著
作佐郎轉太子舍人濯纓登朝冠冕當世升降

兩宮實惟時寶具瞻之範旣著台衡之望斯集
出參太宰軍事入爲太子洗馬俄遷祕書丞贊
道槐庭司文天閣光昭諸侯風流籍甚以父憂
去職喪過乎哀幾將毀滅有識留感行路傷情
服闋除中書侍郎王言如絲其出如綸恪居官
次智效惟穆于時新安王寵冠列蕃越敷邦教
毗佐之選妙盡國華出爲司徒右長史轉尚書
吏部郎執銓以平御煩以簡裴楷清通王戎簡
要復存於茲泰始之初入爲侍中曾不移朔遷

吏部尚書是時天步初夷王途尚阻元戎啓行
衣冠未緝內贊謀謨外康流品制勝旣遠涇渭
斯明賞不失勞舉無失德績簡帝心聲敷物聽
事寧領太子右衛率固讓不拜尋領驍騎將軍
以帷幄之功膺庸祗之秩封雩都縣開國伯食
邑五百戶旣秉辭梁之分又懷寢丘之志所受
田邑不盈百井久之重爲侍中領右衛將軍盡
規獻替均山甫之庸緝熙王旅兼方叔之望冊
陽京輔遠近攸則吳興衿帶實惟股肱頻作二

守並加蟬冕政以禮成民是以息明皇不豫儲
后幼冲貽厥之寄允屬時望徵爲吏部尚書領
衛尉固讓不拜改授尚書右僕射端流平衡外
寬內直弘二八之高暮宣由庚而垂詠太宗即
世遺命以公爲散騎常侍中書令護軍將軍送
往事居忠貞允亮秉國之均四方是維百官象
物而動軍政不戒而備公之登太階而尹天下
君子以爲美談亦猶孟軻致欣於樂正羊職悅
賞於士伯者也丁所生母憂謝職毀疾之重因

心則至朝議以有爲爲之魯侯垂式存公忘私
方進明往爰降詔書敦還攝任固請移歲表奏
相望事不我與屈已弘化屬值三季在辰威蕃
內侮桂陽失圖窺竊神器鼓棹則滄波振蕩建
旗則日月蔽虧出江派而風翔入京師而雷動
鳴控絃於宗稷流鋒鏃於象魏雖英宰臨戎元
渠時殄而餘黨寔繁宮廟憂逼公乃摠熊羆之
士率不貳心之臣戮力盡規克寧禍亂康國祚
於綴旒拯王維於已墜誠由太祖之威風抑亦

仁公之翼佐可謂德刑詳禮義信戰之器也以
靜難之功進爵爲侯兼授尚書令中軍將軍給
班劔二十人功成弗有固秉撝挹改授侍中中
書監護軍如故又以居母艱去官雖事緣義感
而情均天屬頽丁之合禮二連之善喪亦曷以
踰天厭宋德水運告謝嗣主荒怠於天位彊臣
憑陵於荆楚廢昏繼統之功龕亂寧民之德公
實仰贊宏規參聞神算雖無受脤出車之庸亦
有甘寢秉羽之績乃作司空山川攸序兼授衛

軍戎政輯睦旣而齊德龍興順皇高禪深達先
天之運匡贊奉時之業弼諧允正微猷弘遠樹
之風聲著之話言亦猶稷契之臣虞夏荀裴之
奉魏晉自非坦懷至公未監崇替孰能光輔五
君寅亮二代者哉大啓南康爰登中鉉時膺土
宇固辭邦教今之尚書令古之冢宰雖秩輕於
衮司而任隆於百辟斲遂冲旨改授朝端邇無
異言遠無異望帝嘉茂庸重中前冊執五禮以
正民簡八刑而罕用故能騁績康衢延慈哲后

義在資敬情同布衣出陪鑾躡入奉帷殿仰南
風之高誅餐東野之祕寶雅議於聽政之晨披
文於宴私之夕參以酒德問以琴心暇有餘暉
遙然晉想君垂冬日之溫臣盡秋霜之戒肅肅
焉穆穆焉於是見君親之同致知在三之如一
太祖升遐綢繆遺寄以侍中司徒錄尚書事稟
玉几之顧奉綴衣之禮擇皇齊之令典致聲化
於雍熙內平外成實昭舊職增給班劍三十人
物有其容徽章斯允位尊而禮卑居高而思降

自夏徂秋以疾陳退朝廷重違謙光之旨用申
超世之尚改授司空領驃騎大將軍侍中錄尚
書如故景命不永大漸彌留建元四年八月二
十一日薨于私第春秋四十有八昔柳莊疾棘
衛君當祭而輟禮晏嬰既往齊君趨車而行哭
公之云亡聖朝震悼在上群后恇慟在下豈惟
哀纏一國痛深一主而已哉追贈太宰侍中錄
尚書如故給節羽葆鼓吹班劍爲六十人謚曰
文簡禮也夫秉德而處萬物不能害其貞虛已

以游當世不能擾其度均貴賤在條風忘榮辱
在彼我然後可兼善天下聊以卒歲經始圖終
式免祗悔誰云克備公實有焉是以義結君子
惠霑庶類言象所未形述詠所不盡故吏某甲
等感逝川之無捨哀清暉之眇默餐輿誦在丘
里瞻雅詠在京國思衛鼎之垂文想晉鐘之遺
則方高山而仰止刊玄石以表德其辭曰辰精
感運昴靈發祥元首惟明股肱惟良天鑑璿曜
踵武前王欽若元輔體微知章永言必孝因心

則友仁洽兼濟愛深善誘觀海齊量登嶽均厚
五臣茲六八元斯九內暮帷幄外曜台階遠無
不肅邇無不懷如風之偃如樂之諧光我帝典
緝彼民黎率禮蹈謙諒實身幹跡屈朱軒志隆
衡館眇眇玄宗萋萋辭翰義既川流文亦霧散
蒿構云殯梁陰載缺德猷靡嗣儀形長遽怊悵
餘徽鏘洋遺烈久而彌新用而不竭

文選卷第五十八終

音釋

軼渠纏離音紵甫音榆音朮士音朮音沴靈音夕音謹音
種直陸音鏐亡愁魚種音脈音恠音遄音逝音

文選卷第五十九

梁昭明太子蕭統撰

碑文

頭陀寺碑文一首

王簡栖

蓋聞挹朝夕之池者無以測其淺深抑蒼蒼之色者不足知其遠近况視聽之外若存若亡心行之表不生不滅者哉是以掩室摩竭用啓息言之津杜口毗邪以通得意之路然語彞倫者必求宗於九疇談陰陽者亦研幾於六位是故

三才既辨識妙物之功萬象已陳悟太極之致
言之不可以已其在茲乎然父繫所筌窮於此
域則稱謂所絕形乎彼岸矣彼岸者引之於有
則高謝四流推之於無則俯弘六度名言不得
其性相隨迎不見其終始不可以學地知不可
以意生及其涅槃之蘊也夫幽谷無私有至斯
響洪鐘虛受無來不應況法身圓對規矩冥立
一音稱物宮商潛運是以如來利見迦維託生
王室憑五衍之軌拯溺逝川開八正之門大庇

交喪於是玄關幽鍵感而遂通遙源濤波酌而
不竭行不捨之檀而施洽羣有唱無緣之慈而
澤周萬物演勿照之明而鑒窮沙界導亡機之
權而功濟塵劫時義遠矣能事畢矣然後拂衣
雙樹脫屣金沙惟恍惟惚不皦不昧莫繫於去
來復歸於無物因斯而談則棲遑大千無爲之
寂不撓焚燎堅林不盡之靈無歇大矣哉正法
既沒象教陵夷穿鑿異端者以違方爲得一順
非辯僞者比微言於目論於是馬鳴幽讚龍樹

虛求並振頽綱俱維絕紐陰法雲於真際則火
宅晨涼曜慧日於康衢則重昏夜晚故能使三
十七品有禪俎之師九十六種無藩籬之固既
而方廣東被教肆南移周魯二莊親昭夜景之
鑒漢晉兩明並勒丹青之飾然後遺文間出列
刹相望澄什結轍於山西林遠肩隨乎江左矣
頭陀寺者沙門釋慧宗之所立也南則大川浩
汗雲霞之所沃蕩北則層峯削成日月之所迴
薄西眺城邑百雉紆餘東望平臯千里超忽信

楚都之勝地也宗法師行絜珪壁擁錫來游以
爲宅生者緣業空則緣廢存軀者惑理勝則惑
亡遂欲捨百齡於中身徇機膚於猛鷲珥荆蔭
松者久之宋大明五年始立方丈茅茨以庇經
象後軍長史江夏內史會稽孔府君諱覬爲之
薙草開林置經行之室安西將軍郢州刺史江
安伯濟陽蔡使君諱興宗復爲崇基表刹立禪誦
之堂焉以法師景行大迦葉故以頭陀爲稱首
後有僧勤法師真節苦心求仁養志纂脩堂宇

未就而沒高軌難追藏舟易遠僧徒聞其無人
榱桷毀而莫構可爲長太息矣惟齊繼五帝洪
名組三王絕崇祖武宗文之德昭升嚴配格天
光表之功弘啓興復是以維新舊物康濟多難
步中雅頌驟合韶護炎區九譯沙場一候粵在
於建武焉乃詔西中郎將郢州刺史江夏王觀
政藩維桐風江漢擇方城之令典酌龜蒙之故
實政肅刑清於是在寧遠將軍長史江夏內
史行事彭城劉府君諱誼智習所遊日新月故

道勝之韻虛往實歸以此寺崇廢於已安功墜
於幾立慨深覆簣悲同棄井因百姓之有餘閒
天下之無事庀徒揆日各有司存於民以悅
來工以心競亘丘被陵因高就遠層軒延袤上
出雲霓飛閣透迤下臨無地夕露爲珠網朝霞
爲丹雘九衢之草千計四照之花萬品崖谷共
清風泉相渙金姿寶相永籍閑安息心了義終
焉游集法師釋曇珍業行淳脩理懷淵遠今屈
知寺任永奉神居夫民勞事功旣饒文於鐘鼎

言時稱伐亦樹碑於宗廟世彌積而功宣身逾
遠而名紹敢寓言於彫篆庶髮髯乎衆妙其辭
曰質判玄黃氣分清濁涉噐千名含靈萬族淳
源上派澆風下黷愛流成海情塵爲岳皇矣能
仁撫期命世乃睠中土聿來迦衛奄有大千遂
荒三界殷鑒四門幽求六歲亦旣成德妙盡無
爲帝獻方石天開渌池祥河輟水寶樹低枝通
莊九折安步三危川靜波澄龍翔雲起孝山廣
運給園多士金粟來儀文殊戾止應乾動寂順

民終始法本不然今則無滅象正雖闡希夷未
缺於昭有齊式揚洪烈釋網更維玄津重世惟
此名區禪慧攸託倚據崇巖臨睨通壑溝池湘
漢堆阜衡霍撫撫亭臯幽幽林薄媚茲邦后法
流是挹氣茂三明情超六入眷言靈宇載懷興
葺丹刻翬飛輪奐離立象設旣闢睟容已安桂
深冬燠松疎夏寒神足游息靈心往還勝幡西
振貞石南刊

齊故安陸昭王碑文一首

沈休文

公諱緬字景榮南陵人也稷契身佐唐虞有大功於天地商武姬文所以膺圖受錄蕭曹扶翼漢祖滅秦項以寧亂魏氏時乘於前皇齊握符於後靈源與積石爭流神基與極天比峻祖宣皇帝雄材盛烈名蓋當時考景皇帝含道居貞卷懷前代公含展象之秀德體河岳之上靈氣蘊風雲身負日月立行可模置言成範英華外發清明內昭天經地義之德因心必盡簡久遠大

之方率由斯至挹其源者游泳而莫測懷其道者日用而不知昭昭若三辰之麗于天滔滔猶四瀆之紀于地六幽允洽一德無爽萬物仰之而彌高千里不言而斯應若夫彈冠出仕之日登庸蒞事之年軍麾命服之序監督方部之數斯固國史之所詳今可得而略也水德方衰天命未改太祖龍躍俟時作鎮淮泗如仁夕惕之志中夜九迴龕世拯亂之情獨用懷抱深圖密慮衆莫能窺公陪奉朝夕從容左右蓋同王子

洛濱之歲實惟辟疆內侍之年起予聖懷發言
中旨始以文學游梁俄而入掌綸誥蘭桂有芬
清暉自遠帝出于震日衣青光方軌茅社俾侯
安陸受瑞折珪遂荒雲野式掌儲命帝難其人
公以宗室羽儀允膺嘉選協隆三善仰敷四德
博望之苑載暉龍樓之門以峻獻替帷宸實掌
喉唇奉待漏之書銜如絲之旨前暉後光非止
恒授公以密戚上賢俄而奉職出納維允劔璽
增華伊昔帝唐九官咸事熊豹臨貳納言是司

自此迄今其任無爽爰自近侍式贊權衡而皇
情眷眷慮深求瘼姑蘇奧壤任切關河都會殷
負提封百萬全趙之衮服叢臺方此爲劣臨淄
之揮汗成雨曾何足稱乃鴻騫舊吳作守東楚
弘義讓以勗君子振平慧以字小人撫同上德
綏用中典疑獄得情而弗喜宿訟兩讓而同歸
雖春申之大啓封疆鄧攸之緝熙氓庶不能尚
也夏育藩要任重推轂衿帶中流地殷江漢南
接衡巫風雲之路千里西通鄧鄧水陸之塗三

七是惟形勝閩外莫先建庵作牧明德攸在乃
暴以秋陽威以夏日澤無不漸蝼蟻之冗靡遺
明無不察容光之微必照由近而被遠自己而
及物慧與八風俱翔德與五材並運遠無不懷
邇無不肅邑居不聞夜吠之犬牧人不覩晨飲
之羊譽表六條功最萬里還居近侍兼響戎秩
候府寄隆儲端任顯東西兩晉茲選特難羊琇
願言而匪獲謝琰功高而後至升降二宮令績
斯俟禁旅尊嚴主器彌固禹穴神臯地埒分陝

江左以來常遞斯任東渚鉅海南望秦稽淵藪
胥萃藿蒲攸在貨殖之民千金比屋邪壘之內
雲屋萬家刑政繁舛舊難詳一南山羣盜未足
云多激海亂繩方斯易理公下車敷化風動神
行誠恕既孚鉤距靡用不待赭汗之權而奸渠
必翦無假里端之籍而惡子咸誅被以哀矜乎
以信順南陽葦杖未足比其仁潁川時雨無以
豐其澤公攬轡升車牧州典郡感達民祗非待
期月老安少懷塗歌里詠莫不歡若親戚芬若

椒蘭麾旆每反行悲道泣攀車卧轍之戀爭塗
忘遠去思一借之情愈久彌結方城漢池南顧
莫重千里北指崢嶸平塗不過七百西接峽武
關路曾不盈千蠻陬夷徼重山萬里小則俘民
略畜大則攻城剽邑晉宋迄今有切民患烽鼓
相望歲時不息推埋穿掘之黨阡陌成羣傲法
侮吏之人曾莫禁禦累藩咸受其弊歷政所不
能裁加以戎羯窺窬伺我邊隙北風未起馬首
便以南向塞草未衰嚴城在焉早閉永明八載

疆場大駭天子乃心北眷聽朝不怡揚旆漢南
非公莫可於是驅馬原隰卷甲遄征威令首塗
仁風載路軌躅清晏車徒不擾牛酒日至壺漿
塞陌失義犬羊其來久矣徵賦嚴切唯利是求
首鼠疆界災嘉彌廣公翕以廉風孚以誠德盡
任棠置水之情弘郭伋待期之信金如粟而弗
覩馬如羊而靡入雛雉必懷豚魚不爽由是傾
巢舉落望德如歸椎髻懸首日拜門闕卉服滿
塗夷歌成韻禮義旣敷威刑具舉彊民獷俗反

志遷情風塵不起囹圄寂寞富商野次宿秉停
蓄蟪蛄弗起豺虎遠跡北狄懼威關塞謐靜偵
謀不敢東窺駝馬不敢南牧方欲振策燕趙席
卷秦代陪龍駕於伊洛侍紫蓋於咸陽而遘疾
彌留歟焉大漸耕夫釋耒桑婦下機參請門衢
並走羣望維永明九年夏五月三十日辛酉薨
春秋三十有七城府颯然庶僚如賁男女老
幼大臨街衢接響傳聲不踰時而達于四境夷
羣戎落幽遠必至望城拊膺震動邪邑並求入

奉靈輓藩司抑而弗許雖鄧訓致劈面之哀羊
公深罷市之慕對而爲言遠有慙德神駕東還
號送踰境奉觴奠以望靈仰蒼天而自訴震響
成雷盈塗咽水公臨危審正載貽話言楚襄之
請雖幾而彌固衛魚之心身亡而意結二宮軫
慟遐邇同哀追贈侍中領衛將軍綸鼓吹一部
謚曰昭侯時皇上納麓在辰登庸伊始允副朝
端兼掌屯衛聞凶哀震感絕移時因遘沈痾縣
番氣序世祖日夜憂懷備盡寬譬勉膳禁哭中

使相望上雖外順皇旨內歎私痛獨居不御酒
肉坐卧泣涕霑衣若此移年癯瘠改貌天倫之
愛振古莫儔及俯膺天眷入纂絕業分命懿親
台牧並建對繁弱以流涕望曲阜而含悲改贈
司徒因謚爲郡王禮也惟公少而英明長而弘
潤風標秀舉清暉映世學徧書部特善玄言肇
軌之麗篆籀之則窮六義於懷抱究八體於毫
端奕思之微秋儲無以競巧取揆之妙流睇未
是稱奇至公以奉上鳴謙以接下撫僚庶盡盛

德之容交士林忘公侯之貴虛懷博納幽關洞
開宴語談笑情瀾不竭譽滿天下德冠生民蓋
百代之儀表千年之領袖曾不憖留梁摧奄及
豈唯僑終蹇謝興謠輟相而已哉凡我僚舊均
哀共戚怨天德之無厚痛棠陰之不甯思所以
克播遺塵敝之穹壤乃刊石圖徽寄情銘頌其
辭曰天命玄鳥降而生商是開金運祚始玉筐
三仁去國五曜入房亦白其馬侯服周王本枝
派別因萊命氏涉徐而東義均梁徒自茲以降

懷青地紫崇基巖巖長瀾瀾瀾惟聖造物龍飛
天步載鼎載革有除有布高皇赫矣仰膺乾顧
景皇蒸哉實啓洪祚喬嶽峻峙命世興賢應期
誕德絕後光前機以成務覺在民先位非大寶
爵乃上天爰始濯纓清猷濬發升降文陛逶迤
魏闕惠露霑吳仁風翳越涉夏踰漢政成期月
用簡必從日新爲盛在上哀矜臨下莊敬草木
不天昆蟲得性我有芳蘭民胥攸詠羣夷蠢蠢
巖別嶂分傾山盡落其從如雲挈妻荷子負戴

成群迴首請吏曾何足云昔聞天道仁罔不遂
彼蒼如何興山止簣四牡方馳六龍頓轡斯民
曷仰邦國殄瘁齊隕晏平行哭致禮趙徂昌國
列邦揮涕況我君斯皇之介弟哀感徒庶慟興
雲陛階毀晉攢川汎歸軸競羞野奠爭攀去轂
遵渚號追臨渡望哭無絕終古惟蘭與菊塗由
帝渚朱軒靡駕東首塋園即宮長夜逝川無待
黃金難化鐘石徒刊芳猷求謝

墓誌

劉先生夫人墓誌一首 任彥升

既稱萊婦亦曰鴻妻復有令德一與之齊實佐
君子簪蒿杖藜欣欣負載在冀之畦居室有行
丞聞義讓稟訓丹陽弘風丞相籍甚二門風流
遠尚肇允才淑閭德斯諒蕪沒鄭鄉寂寥楊冢
參差孔樹毫末成拱暫啓荒塋長扃幽隴夫貴
妻尊匪爵而重

文選卷第五十九終

音釋

腴肌間被庀喜龕堪銜含戡尹鄴悠隴桓鄒皎
喙綠賁元悠斬

文選卷第六十

梁昭明太子蕭統撰

行狀

齊竟陵文宣王行狀一首

祖太祖高皇帝

父世祖武皇帝

任彥昇

南徐州南蘭陵郡縣都鄉中都里蕭公年三十五行狀

公道亞生知照隣幾庶孝始人倫忠爲令德公

實體之非毀譽所至天才博瞻學綜該明至若
曲臺之禮九師之易樂分龍趙詩析齊韓陳農
所未究河澗所未輯有一在此罔不兼綜者歟
昔沛獻訪對於雲臺東平齊聲於楊史淮南取
貴於食時陳思見稱於七步方斯篋如也初沈
攸之跋扈上流稱亂陝服宋鎮西晉熙王南中
郎邵陵王並鎮益口世祖毗贊兩藩而任撫西
伐公時從在軍鎮西府叛寧朔將軍軍主南中
郎版補行參軍署法曹于時景燭雲火風馳羽

檄謀出股肱任勅書記遷左軍邵陵王主簿記
室參軍既允焚林之求實兼儀形之寄刀筆不
足宣功風體所以弘益除邵陵王友又爲安南
邵陵王長史東夏形勝關河重複選衆而舉敦
說斯在除使持節都督會稽東陽臨海永嘉新
安五郡諸軍事輔國將軍會稽太守太祖受命
廣樹藩屏公以高昭武穆惟戚惟賢封聞喜縣
開國公食邑千戶又以奏課連最進號冠軍將
軍越人之坐覩正風而化俗篋簞之會感義讓

而失險邪叟忘其西吳龍丘彼其東臯會武皇
后崩公星言奔波泣血千里水漿不入於口者
至自禹穴逮衣裳外除心哀內疚禮屬老厭降
事迫於權奪而茹感肌膚沈痛瘡距故知鐘鼓
非樂云之本縗麤非隆殺之要改授征虜將軍
丹陽尹良家入徙戚里內屬政非一軌俗備五
方公內樹寬明外施簡惠神臯載穆轂下以清
武帝嗣位進封竟陵郡王食邑如千戶復授使
持節都督南徐兖二州諸軍事鎮北將軍南徐

州刺史遷使持節侍中都督南兖徐北兖青冀
五州諸軍事征北將軍南兖州刺史兖徐接壤
素漸河潤未及下車仁聲先洽王關靖柝北門
寢扃朝旨以董司畜牧敷興邦教方任雖重比
此爲輕徵護軍將軍兼司徒侍中如故又授車
騎將軍兼司徒侍中如故即授司徒侍中又如
故上穆三能下敷五典闢玄闈以闡化寢鳴鍾
以體國翼亮孝治緝熙中教奪金耻訟蹊田自
嘿不彫其朴用晦其明聲化之有倫繫公是賴

庠序肇興儀形國胄師氏之選允歸人範以本
官領國子祭酒固辭不拜八座初啓以公補尚
書令式是敷奏百揆時序夫國家之道互爲公
私君親之義遞爲隱犯公二極一致愛敬同歸
亮誠盡規謀猷弘遠矣又授使持節都督揚州
諸軍事揚州刺史本官悉如故舊惟淮海今則
神牧編戶殷阜萌俗滋繁不言之化若門到戶
說矣頃之解尚書令改授中書監餘悉如故獻
納樞機絲綸允緝武皇晏駕寄深負圖公仰惟

國典俛遵遺託俯擗天倫踊絕于地居處之節
復如居武穆之憂聖主嗣興地居旦奭有詔策
授太傅領司徒餘悉如故坐而論道動以觀德
地尊禮絕親賢莫貳又詔加公入朝不趨讚拜
不名劔履上殿蕭傅之賢曹馬之親兼之者公
也復以中威重道增崇德統進督南徐州諸軍
事餘悉如故並表疏累上身沒讓存天不憖遺
梁岳頽峻某年某月日薨春秋三十有五詔給
溫明秘器歛以衮章備九命之禮遣大鴻臚監

護喪事朝夕莫祭太官供給禮也故以慟極津
門感充長樂豈徒春人不相傾壘罷肆而已哉
乃下詔曰褒崇庸德前王之令典追遠尊戚公
情之所隆故使持節都督揚州諸軍事中書監
太傅領司徒揚州刺史竟陵王新除進督南徐
州體睿履正神監淵邈道冠民宗具瞻惟允肇
自弱齡孝友光備爰及贅契協升景業變和台
曜五教克宣敷奏朝端百揆惟穆寄重先顧任
均負圖諒以齊徽二南同規往哲方憑保佑永

翼雍熙天不憖遺奄見薨洛哀慕抽割震動于
厥心今先遠戒期龜誅襲吉茂崇嘉制式弘風
猷可追崇假黃鉞侍中都督中外諸軍事太宰
領大將軍揚州牧綠綬綬具九錫服命之禮使
持節中書監王如故給九旒鑾輅黃屋左纛輜
輶車前後部羽葆鼓吹挽歌二部虎賁班劍百
人葬禮一依晉安平獻王孚故事公道識虛遠
表裏融通淵然萬頃直上千仞僕妾不覩其喜
愠近侍莫見其傾弛他人之善若已有之民之

不臧公實貽耻誘接恂恂降以顏色方在事上好下規已而廉在殖財施人不倦帝子儲季令行禁止國網天憲實諸掌握未嘗鞠人在輕刑錮人在重議人有不及內恕諸已非意相干每爲理屈任天下之重體生民之俊華袞與緼緒同歸山藻與蓬茨俱逸良田廣宅符仲長之言卽山洛水協應叟之志丘園東國錙銖軒冕乃依林構宇傍巖柘架清後與壺人爭旦緹幙與素瀨交輝置之虛室人野何辨高人何點躡躑

在鐘阿徵士劉虬獻書在衡岳贈以古人之服弘以度外之禮屈以好士之風申其趨王之意乃知大春屈已五王君大降節憲后致之有由也其卉木之奇泉石之美公所製山居四時序言之已詳文皇帝養德東朝同符作者爰造九言實該百行遵衿橘在末萌申罔戒在茲日非直旦暮千載故乃萬世一時也命公注解衛將軍王儉綴而序之山宇初構超然獨往顧而言曰死者可歸誰與入室尚想前良俾若神對乃

命畫工圖之軒牖旣而緬屬賢英傍思才淑匹
婦之操亦有取焉有客游梁朝者從容而進曰
未見好德愚竊惑焉即命刊削投杖不暇公以
爲出言自口騷騷不追聽受一謬差以千里所
造箴銘積成卷軸門階戶席寓物垂訓先是震
于外寢匠者以爲不祥將加治葺公曰此天譴
也無所改脩以記吾過且令戒懼不怠從諫如
順流虛已若不足至在言窮藥石若味滋旨信
必由中貌無外悅貴而好禮怡寄典墳雖牽以

物役孜孜無怠乃撰四部要略淨住子並勒成
一家懸諸日月弘洙泗之風闡迦維之化大漸
彌留話言盈耳黜殞之請至誠懇惻豈古人所
謂立言在在世沒而不朽者歟易名之典請遵前
烈謹狀

弔文

弔屈原文一首

并序

賈誼

誼爲長沙王太傅旣以謫去意不自得及渡湘
水爲賦以弔屈原屈原楚賢臣也被讒放逐作

離騷賦其終篇曰已矣哉國無人兮莫我知也
遂自投汨羅而死詎追傷之因以自喻其辭曰
恭承嘉惠兮俟罪長沙側聞屈原兮自沉汨羅
造託湘沅兮敬弔先生遭世罔極兮乃隕厥身
嗚呼哀哉逢時不祥鸞鳳伏竄兮鴟梟翺翾
尊顯兮讒諛得志賢聖逆戾兮方正倒植世謂
隨夷爲溷兮謂跖蹻爲廉莫邪爲鈍兮鈇刀爲
鋌于嗟默然生之無故兮幹棄周鼎寶康瓠兮
騰駕罷牛驂蹇驢兮驥垂兩耳服鹽車兮章甫

薦履漸不可久兮嗟苦先生獨離此咎兮孰曰
已矣國其莫我知兮獨壹鬱其誰語鳳漂漂其
高逝兮固自引而遠去襲九淵之神龍兮沕深
潛以自珍偃蜩蟪以隱處兮夫豈從蝦與蛭螾所
貴聖人之神德兮遠濁世而自藏使騏驎可得
係而羈兮豈云異夫犬羊般紛紛其離此尤兮
亦夫子之故也歷九州而相其君兮何必懷此
都也鳳皇翔于千仞兮覽德輝而下之見細德
之險微兮遙增擊而去之彼尋常之汙瀆兮豈

能容夫吞舟之巨魚橫江湖之鱣鯨今固將制
於螻蟻

弔魏武帝文

陸士衡

元康八年機始以臺郎出補著作游乎秘閣而
見魏武帝遺令愀然歎息傷懷者久之客曰夫
始終者萬物之大歸死生者性命之區域是以
臨喪殯而復悲覩陳根而絕哭今乃傷心百年
之際興哀無情之地意者無乃知哀之可有而
未識情之可無乎機答之曰夫日蝕由乎交分

山崩起於朽壤亦云數而已矣然百姓怪焉者
豈不以資高明之質而不免卑濁之累居常安
之勢而終嬰傾離之患故乎夫以迴天倒日之力
而不能振形骸之內濟世夷難之智而受困魏
闕之下已而格乎上下者藏於區區之木光于
四表者翳乎叢爾之土雄心摧於弱情壯圖終
於哀志長筭屈於短日遠跡頓於促路嗚呼豈
特瞽史之異闕景黔黎之怪頽岸乎觀其所以
顧命冢嗣貽謀四子經國之略旣遠隆家之訓

能容夫吞舟之巨魚橫江湖之鱣鯨今固將制
於螻蟻

弔魏武帝文

陸士衡

元康八年機始以臺郎出補著作游乎秘閣而
見魏武帝遺令愀然歎息傷懷者久之客曰夫
始終者萬物之大歸死生者性命之區域是以
臨喪殯而復悲覩陳根而絕哭今乃傷心百年
之際興哀無情之地意者無乃知哀之可有而
未識情之可無乎機答之曰夫日蝕由乎交分

山崩起於朽壤亦云數而已矣然百姓怪焉者
豈不以資高明之質而不免卑濁之累居常安
之勢而終嬰傾離之患故乎夫以迴天倒日之力
而不能振形骸之內濟世夷難之智而受困魏
闕之下已而格乎上下者藏於區區之木光于
四表者翳乎叢爾之土雄心摧於弱情壯圖終
於哀志長筭屈於短日遠跡頓於促路嗚呼豈
特瞽史之異闕景黔黎之怪類岸乎觀其所以
顧命冢嗣貽謀四子經國之略旣遠隆家之訓

亦弘又云吾在軍中持法是也至在小忿怒大過失不當效也善乎達人之謹言矣持姬女而指季豹以示四子曰以累汝因泣下傷哉曩以天下自任今以愛子託人同乎盡者無餘而得乎亡者無存然而婉變房閨之內綢繆家人之務則幾乎密與又曰吾婕妤妓人皆著銅爵臺於臺堂上施八尺牀張總帳朝脯上脯糒之屬月朝十五日輒向帳作妓汝等時時登銅雀臺望吾西陵墓田又云餘香可分與諸夫人諸舍

中無所爲學作履組賣也吾歷官所得綬皆著藏中吾餘衣裘可別爲一藏不能者兄弟可共分之旣而竟分焉亡者可以勿求存者可以勿違求與違不其兩傷乎悲夫愛有大而必失惡有甚而必得智惠不能去其惡威力不能全其愛故前識所不用心而聖人罕言焉若乃繫情累於外物啻曲念於閨房亦賢俊之所宜廢乎於是遂憤懣而獻弔云爾接皇漢之末緒值王塗之多違佇重淵以育鱗撫慶雲而遐飛運神

道以載德乘靈風而翦威摧羣雄而電擊舉勳
敵其如遺指八極以遠略必翦焉而後綏釐三
才之闕典啓天地之禁闡舉脩網之絕紀紐大
音之解微掃雲物以貞觀要萬塗而來歸丕大
德以宏覆援日月而齊暉濟元功於九有固舉
世之所推彼人事之大造夫何往而不臻將覆
簣於浚谷擠爲山乎九天苟理窮而性盡豈長
算之所研悟臨川之有悲固梁木其必顛當建
安之三八實太命之所艱雖光昭於曩載將稅

駕於此年惟降神之縣邈眇千載而遠期信斯
武之未喪膚靈符而在茲雖龍飛於文昌非王
心之所怡憤西夏以鞠旆沂秦川而舉旗踰鎬
京而不豫臨渭濱而有疑冀翌日之云瘳彌四
旬而成災詠歸塗以反旆登嶠澠而竭來次洛
汭而大漸指六軍曰念哉伊君王之赫奕寔終
古之所難威先天而蓋世力盪海而拔山厄奚
險而弗濟敵何彊而不殘每因禍以提福亦踐
危而必安迄在茲而蒙昧慮噤閉而無端委軀

命以待難痛沒世而永言撫四子以深念循虜
體而積歎迨營魄之未離假餘息乎音翰執姬
女以頻瘁指李豹而淮馬氣衝襟以嗚咽涕垂
睫而汎瀾違率土以靜寐戢彌天乎一棺容宏
度之峻邈壯大業之允昌思居終而恤始命臨
沒而肇揚援貞吝以悲悔雖在我而不臧惜內
顧之纏絲恨末命之微詳紆廣念於履組塵清
慮於餘香結遺情之婉孌何命促而意長陳法
服於帷座陪窈窕於玉房宣備物於虛器發哀

音於舊倡矯感容以赴節掩零淚而薦觴物無
微而不存體無惠而不亡庶聖靈之響像想幽
神之復光苟形聲之翳沒雖音景其必藏微清
絃而獨奏進脯糒而誰嘗悼總帳之冥漠怨西
陵之茫茫登爵臺而羣悲貯美目其何望既睎
古以遺累信簡禮而薄葬彼裘紱於何有貼塵
謗於後王嗟大戀之所存故雖哲而不忘覽遺
籍以慷慨獻茲文而悽傷

祭文

祭古冢文一首

并序

謝惠連

東府掘城北塹入丈餘得古冢上無封城不用
塹甃以木爲槨中有二棺正方兩頭無和明器
之屬材瓦銅漆有數十種多異形不可盡識刻
木爲人長三尺可有二十餘頭初開見悉是人
形以物棖撥之應手灰滅棺上有五銖錢百餘
枚水中有甘蕉節及梅李核瓜瓣皆浮出不甚
爛壞銘誌不存世代不可得而知也公命城者
改埋於東岡祭之以豚酒旣不知其名字遠近

故假爲之號曰溟漠君云爾

元嘉七年九月十四日司徒御屬領直兵令史
統作城錄事臨漳令亭侯朱林具豚醪之祭敬
薦冥漠君之靈恭總徒旅版築是司窮泉爲塹
聚壤成基一槨旣啓雙棺在茲捨畚悽愴縱鍾
漣而芻靈已毀塗車旣摧几筵糜腐俎豆傾低
盤或梅李盎或醢醢蔗傳餘節瓜表遺犀追惟
夫子生自何代曜質幾年潛靈幾載爲壽爲夭
寧顯寧晦銘誌堙滅姓字不傳今誰子後曩誰

子先功名美惡如何蔑然百堵皆作十仞斯齊
墉不可轉壑不可迴黃腸旣毀便房已頽循題
興念撫俑增哀射聲垂仁廣漢流渥祠骸府阿
掩骼城曲仰美古風爲君改卜輪移北隍窀穸
東麓壙卽新營棺仍舊木合葬非古周公所存
敬遵昔義還拊雙魂酒以兩壺牲以特豚幽靈
髣髴歆我犧樽嗚呼哀哉

祭屈原文一首

顏延年

維有宋五年月日湘州刺史吳郡張邵恭承帝

命建旆舊楚訪懷沙之淵得捐珮之浦弭節羅
潭艤舟汨渚乃遣戶曹掾某敬祭故楚三閭大
夫屈君之靈蘭薰而摧玉纁則折物忌堅芳人
諱明絜曰若先生逢辰之缺溫風急時飛霜急
節羸羊邁紛昭懷不端謀折儀尚貞蔑椒蘭身
絕郢闕跡徧湘干比物荃蓀連類龍鸞聲溢金
石志華日月如彼樹芬實頽實發望汨心歛瞻
羅思越藉用可塵昭忠難闕

祭顏光祿文一首

王僧達

維宋孝建三年九月癸丑朔十九日辛未王君
以山羞野酌敬祭顏君之靈嗚呼哀哉夫德以
道樹禮以仁清惟君之懿早歲飛聲義窮幾豕
文蔽班楊性姪剛絜志度淵英登朝光國實宋
之華才通漢魏譽浹龜沙服爵帝典棲志雲阿
清交素友比景共波氣高叔夜嚴方仲舉逸翮
獨翔孤風絕侶流連酒德嘯歌琴緒游顧移年
契闊宴處春風首時爰談爰賦秋露未凝歸神
太素明發晨駕瞻廬望路心悽日泫情條雲互

涼陰掩軒娥月寢耀微燈動光几牘誰炤衾衽
長塵絲竹罷調擘悲蘭宇屑涕松嶠古來共盡
牛山有淚非獨昊天殲我明懿以此忍哀敬陳
奠饋申酌長懷顧望戲歎嗚呼哀哉

音釋

擗皮綻麗輶溫輶涼緒佇訖信倂面蠅堯蛭質
蟪引積顏悲記芋密

萬曆戊寅歲

楚府校刊



